

四庫全書

集部

欽定四庫全書

集部

祠部集卷二十九

詳校官庶吉士臣朱理

檢討臣何思鈞覆勘

總校官編修臣朱鈐

校對官編修臣高棫生

謄錄監生臣朱一鳴

欽定四庫全書

祠部集卷二十八

宋 强至 撰

書

代魏公賀昭文相公書

伏審進膺顯冊復秉洪鈞廊廟登賢寰區均慶伏惟某
官山河間氣社稷宗工挾重計以翊本朝履正德以儀
庶位措今師古早攄珍策於可行尊主澤民以邇偉謨
於已試向辭幾政之要濟布教條之寬顧西土之具瞻

通歸帥尹頌東山之強起實為蒼生行宣經濟之元猷
坐格太平之極致某側聞成命竊忤丹衷

賀王叅政書

竊審茂對制恩叅聞幾務君子得行其道衆賢相慶於
朝伏惟某官函德淳深秉彝惇大體溫辭而書命三代
之風可還對清問以傳經一時之論無苟天下之望蚤
名未仕之臯夔廷中之謨暫貳有聲之邴魏側聞睿簡
增忤鄙懷

上相州傅待制書

此參戎幕未逾匝月之期再頒軍書復應上臺之辟審
開尊府適在別都既不能備一日之使令得稱故吏於
門下又不獲釋累年之願望畧聞餘論於坐隅遐企末
光增深愚抱伏惟某官量包公輔學際聖賢廣譽令名
仰若泰山之重危言珍策措諸四海之安蚤臨長於諫
垣旋出觀於治屏上心圖治矧聞獻納之前規中詔趨
歸當鬯經綸之偉業春韶過半時祉載蕃願為國家精

調寢餼

代魏公回劉郎中書

比總帥符蓋疏賢範宣本朝之利澤方究寸懷枉順驛
之飛文過形厚意矧惟鉅業夙簡淵衷佇馬政之有成
被龍光於不次餘惟輔衛少副願言

回趙叅政書

比領守符兼提師路纔奉行於寬詔即論謝於單函國
論多餘郵音繼及過形賁飾增重常彛惟參斷於萬幾

諒翕膺乎百福伏惟某官端朝碩望經世元猷天下表
儀仰淵騫之德行廷中事業贊邴魏之謀謨益保粹襟
行膺徽冊

回王宣徽書

比緣病質丐領僻州帥路別都遽蒙於委寄守符留鑰
遂忝於交承賴善政之有條容鄙才之循跡尚期必告
得盡所聞

又

邁馳卓馬之朝入赴蒼龍之闕方懷盛德稽布尺書忽
前墜於誨音第中藏於感臆伏惟某官道包衆美氣稟
元精出入三朝備紓於賢業東西二府行慰於民瞻伏
望上為邦家益綏寢饋

代馮內翰回廣州余尚書書

伏審被明詔之溫辭陟中臺之貴秩官儀益峻物論愈
榮敢圖自損達尊首貽寵教仰服謙懷之厚第藏感臆
之深恭惟某官道德宗工文章雋老才周數器名重本

朝危言早動於丹墀偉績近光於銅柱兼倚遠畧暫提
南海之要封若咨升庸當簡曲江之舊德伏望上為邦
社精綏燕興

代王內翰上賈梁二相書

某擢始孤生躡躋近侍與材散木繫化匠之為容獲器
寒金繇宰鈞之所鑄旋冒複門之華選寢疏翹館之盛
游居企台儀間勞禁職曾缺音函之獻莫謔德宇之寧
伏惟靜鎮會都樂班寬詔神明所右福祚其蕃恭以某

官識交天人誠貫日月帶上公之印綬擁方伯之旌旗
威行列城令肅外閫身任安危之重遠俗猶聞才通文
武之兼萬邦以憲雖袞衣願封於東邑欲留周公而舟
楫能濟於巨川當用商相行膺徽冊還秉元鈞

程宣徽書

阻拜台符屢環歲歷實首承於內命且兼領於他司間
裁詔誥之餘旋汨簿書之冗單函不講盛德焉依竊恃
誤知之深尚寬苛禮之廢伏惟坐觀藩政翕受天祺恭

以某官道具將明體凝簡厚抱廟堂之偉業挺金石之
純誠貳政鈞樞少見大人之能事班條屏翰未收真相
之極功矧徽省之臣區即宰塗之便道節趨非晚柄任
其時林躍維深文陳曷罄

王定州君貺張南京安道錢泰州子飛書

逖阻珍羣屢遷華序思綸言之對掌深慕昔游玷詔旨
之首承實虧時望牽禁局之職業事官府之文移寸慮
日勞天書坐應念惟妙履參嚮龐褫恭以某官忠諒一

心誠明正性高文典冊以甲乎科等危言至論以根夫
治經潤色辰猷蚤摠不世之蘊謨明王體久具有生之
瞻旅析左符適臨臣屏矧講求於新治方諮納於嘉謀
靡須五月之政成即被三篇之冊拜

唐龍圖子方書

伏惟衆臨大計誕擁繁禧恭以某官名世標才際天蘊
識蚤紓賢業自結主知開正論於煉垣竣榮班於延閣
時議加重風聲有休董北道之輸將暫煩碩畫瞻中都

之供億佇報膚功行奉詔音驟歸柄任

吳仲庶孫次公王至之張文裕書

久濶朝游載瞻賢範禁塗視草適居侍從之勞訟舍坐
棠諒樂中和之職伏惟某官當世雋老為時聞人猷謀
可師德業甚懋總列城於一道節制攸歸嚴督府之萬
兵恩威並暢行祇迅台益衛粹襟

李西臺書

邇職禁局久違德宇伏惟踐文昌之貴秩樂素里之平

居益介康祺彌餘逸韻恭以某官得氣間傑為時老成
識達聖賢之歸言該名理之要栢臺留務遂清尚以優
游李蹠慶宗襲餘芳之止足倍慎高言之養行光大政
之誥

栢殿後問候書

總師西來百為所繫懷賢東望千里而遙馳誠則深布
問差緩矧惟雄畧夙簡睿心節旄蚤進於榮班陞戰久
提於禁旅行膺薇冊入贊鴻樞益護燕興庶符瞻頌

回懷州傳待制書

承臨使郡已布寬條高誼迥存珍函昔及矧惟厚望早
服近班筆下極言嘗論治亂之體禁中勸講久格聖人
之聰諒坐席之甫溫即鋒車之趣召

渭州蔡待制問候書

帥符所守顧燕語之莫同使驛之來反函封之繼相比
惟福履誕擁龐褭緩帶輕裘坐銷邊鄙之警長轡遠御
益重朝廷之威更冀珍頤別膺寵數

回新夔州路提形李少卿書

竊審被命中宸按章左蜀首詔尺牘增戢寸襟矧厚望
之端朝加傑才之經世躋榮仰寺久懋於風聲擢職使
臺行光於時論

回呂省副書

審承名節進貳財闡解守紱以還朝抗使旌而就道嘉
謨造膝行入對於清光賢業致身期坐追於先烈沐音
函之叙別企德範以馳誠益護寢興少符瞻頌

回諸處知州寒食問候書

本行貫序禁火丁辰首枉書辭備形禮意矧惟治績洽
著懽謠佳節適臨蕃禧參嚮其為感頌曷盡名云

回楊四廂書

向承高誼遠枉盛牋論志意之欲為顧言辭之甚壯知
是仁者之有勇可使懦夫之聞風間又相規正如所願
其為欽感尤劇銘藏

回郭宣徽禁烟問候書

木行貫序火禁丁辰首枉誨音備形禮意伏惟某官位
光台路勲在王家龍虎兵韜自坐籌於方畧貔貅將士
皆遠服於威名臨履春和益蕃時祉

回王介甫內翰書

入相三朝坐彌一紀以有限之才而應無窮之務豈惟
精力之已疲以嘗試之身而妨未用之賢抑亦寵榮之
太久懇陳軒陛得守鄉邦功名弗居雖暫往哲之趨進
退粗得偶合至賢之心喜素節之護全枉盛辭而溢美

適來總帥遂緩布書旋承違樂職之高懷屬演綸之大
手前席論議密簡聖人之表本朝文章行追典誥之體
春暄未過福履自持卑情無任瞻戀依馳之至

回新知虢州田大卿書

比承高誼特貺辰牋攄經世之遠謀條御邊之上策析
文武為二道既破據儒之談講兵戎之大幾有裨陋識
之見不時布謝惟日懷慙春序過中生經增裕更加精
畚以對寵褒

賀提刑雷左藏書

審承恩詔出按刑章矧風績之久凝加時名之素著首
膺拜選允穆朝言佇聞庶獄之平反庸副上心之欽恤
下車視事列郡瞻風快忻攸深敷云非悉

趙參政韓副樞劄副樞問候書

邇來總帥訖此踰時乏文武之兼資統兵民於諸道內
收已竭之慮外役久勞之軀殆無少間遂缺通問伏某
官德函惇大才貫幾深經世有為擴初心於康濟致君

以道鬯偉蹟於太平行膺徽冊之光以副薦紳之屬春
韶云暮時祉載蕃益保燕興少符瞻頌

賀北京王宣徽書

竊審誕膺制冊增竣台儀成命既行羣言允伏伏惟某
官器函惇大道貫惇深早更要路之遊徧歷禁塗之選
司別都之管鑰再倚保釐秉二府之鈞樞久稽登用聊
褒崇大偉業繫宣鬯於徽猷行肆命於三篇以圖寧於
萬化永言忭頌曷究悃悃

荅賀慶陽李水部幾宜書

竊審遠赴辟書比臨戎幕高材所處大府之光伏惟機
議水部識度惇深性資夷曠屢違藩鎮之薦自樂丘園
之居宜難退身起為知己兵民胥賴喜婉畫之必從賓
主相權計成功之可底行疇顯效進服華章依頌并深
名言非悉

回河陰提舉輦杜比尚書

伏審顯膺明命榮領劇司未列慶函首貽誨牘欣服謙

矩增銘感悰伏惟提舉比部風力素強時才兼懋董河
放於一道方賴底功按舟運之萬艘遽更重寄行旌顯
效進服華章欣頌并深文陳非恚

回賀吳舍人書

審被制函進陞詞掖矧惟厚望蚤映端朝重潤色於辰
猷首廷登於俊德文章獨擅榮司綸綍之言伯仲相望
增盛衣冠之事其為欣慰奚盡敷云

回相州謝秘監謝到任書

審印便時已班寬詔矧惟者德早懋風猷望所舍之甘
崇阻觀新政喜故鄉之喬木亦被深仁首墜誨音增銘
感臆

回降州薛郎中謝到任書

竊審涓辰其吉布治云初曾慶問之未修遽榮緘之首
及矧惟風力卓建事功卷百城澄按之才就一郡撫柔
之寄寧久班於寬詔必當復於要權威頌并懷名言非

諭

回前知虢州李大卿謝得替書

辱紆累幅承解左符行路遮留感惜仁候之去還朝進
對佇別明主之休矧治最之告成即恩章之增寵勉加
導衛庸慰攀祈

河北運使張兵部問候書

帥府所總遂成訊問之踈使範且遙第悵燕言之隔惟
翰將於北道方贍給於中都心計坐經事功日懋甫交
春夏未適寒暄宜益護於寢興即前膺於進擢

回張度之書

比以強敵玩塞重師宿邊爰咨近臣俾護諸將方安陽
得守之後甫爾北歸以康定用兵之間嘗參西畧命曰
俞往義何敢辭竊自視短踈之才阻相從論議之益或
上憑睿算粗寧疆堠之繹騷則再請鄉邦稍覲病軀之
休息辱書云及見意良勤懷戒欽銘兼深悃臆

回京西提刑徐郎中謝到任書

審即便時已臨重職遠紆珍牘備諭謙懷矧風力之素

強加時名之薰飭按章列郡獄將底於無寃翔步要塗
門佇符於必大

回提刑康左藏書

比審涓辰已諧視事迥存勤意首枉珍題矧素著於能
聲復深懷於壯畧參按刑章之劇佇登治狀之優欣佩
并深名言非悉

鄜州潘皇城鎮潼桑少卿問候書

向總帥符每懷賢範方悵晤言之偏遽欣音問之來春

夏甫交寢興良適矧久凝於風績行茂對於恩章益覲
珍調少符勤禱

回徐州趙觀文問候書

向處近司最叨至契青雲當日既得路以同升黃閣此
時復請麾而繼去春言暎隔積有寤思檄書頗多函訊
遂缺此惟妙履益介龐禡伏以某官勲懋三朝道光一
德懇辭要路暫收康濟之偉才樂就東藩自養壽臧之
盛福未繇清晤曷罄丹衷

回徐州趙觀文書

竊審屢陳封奏始解政機爰均佚於善藩仍躋榮於祕
殿素懷茲適清議逾高伏惟某官道際醇全德涵渾厚
千載台路一心王家舉至治於可行避成功而不有宰
鈞咫尺弗須徽冊之登庸守絀優游自喜黃堂之卧理
未修慶禮先枉誨音感怍并懷名言非諭

回种作坊書

遠煩專介垂致長牋承謙短之持循列遜辭而刻責行

觀後效庸紹先芬欽服尤深諭言非悉

回南京李太尉問候書

向總帥符益疏賢範比缺音函之奉仰諮德宇之安敢
謂隆謙遽先惠問肇臨夏籥增固生經伏惟某官偉畧
冠時純忠許國慶傳相公之後望重親賢之間出布寬
條兼領別都之管籥行膺訊台對司有府之樞機更冀
珍頤少符虔頌

謝韓魏公書

今月五日伏奉敕命就充前件差遣者大丞相之尊矧
出專於遠畧諸從事之後乃容有於孱生任非所長媿
不勝數如某者下科二紀孤宦四方未為造物之所知
已分委身於無用向參戒於一道甫備位於再期顧吏
課以曾無於軍書而何有忽聞邊釁之啟函賴廟謨之
平特煩上公並護諸將幕府諸彥各懷所有而從行江
鄉鯁儒合謝不能而引去弗為逐客已曰幸人况辱薦
章之留更形褒字之寵隨降俞旨實緣重言恭惟文武

之兼資當此兵民之大寄九塞外地形之險易如探諸
懷每筆端疆事之指麾不勞餘力就有屬察之一得曷
裨精慮之萬分夫何妄庸亦被收米此蓋伏遇判府經
畧司徒侍中以陞絀天下士倫之手為進退幕中賓從
之心聰明所臨賢否俱判察介愚之有守發慰薦於無
疑敢不慷慨功名激昂志氣誓堅素節圖報厚恩舍此
以還未知所措

荅陝府知府秘堅書

跡繫關中心馳門下自嗟仕路之晚輩未識儒林之丈
人屢欲一書之上陳率因多事而中廢簡疎已甚罪戾
是期敢圖恩容迥出意料首頌溫教垂領寒蹤捧讀以
還感慚尤劇仰惟舊德夙懋壯猷坐布寬條茲繼召公
之聽訟行追先烈豈專邢晏之多才伏望上為邦家精
調寢餼下情無任激切感頌之至

代魏公問候青州歐陽尚書書

並游台路繼領守符道誼之尊矧平生之所慕晤言之

隔因終日以載思順履煩災誕膺茂祉伏惟某官乾坤
間氣社稷元勳力辭幾政之繁樂布教條之裕功成不
處一州暫卷於經綸治間多餘大筆時爭於造化行謨
王體還慰民瞻益護粹襟前迎徽冊

回滋州晁大卿書

竊審最狀告成更書受代扶老携幼莫挽鄧侯之來進
直納忠將前文帝之間伏惟知府大卿器涵渾厚才貫
幾深蚤收時名履想風蹟藩條宣布已副朝廷之長人

國論謨明佇還家世之舊物遽違比賴方劇攀瞻首枉
誨音仰銜謙德益調寢餼前服寵休感頌傾祈不勝下
懇

回新提舉雜使司李郎中書

竊審祥琴甫御恩詔隨頒實藉周才復司重任行棲餘
批增牂丹衷伏惟提舉郎中望厚本朝用兼數器劇繁
之委中外以更富國強兵蚤講明於利術飛芻輓粟游
董按於邊儲行底茂功函膺顯用尚稽修慶首辱賜書

感躍并懷名言非諭

河陽富相公書

出刺劇州遽彌於歲歷坐疏翹館增跂於台躔懼干上
衮之威遂缺單函之獻伏惟布宣寬詔偃息重藩陰有
神明來相福祚恭惟某官樞衡舊德金石純誠才兼文
武之資身繫安危之託辭神機之制勝露公冕以觀風
太師維垣均佚河喬之鎮一相處外增勞巖石之瞻寒
籥貫辰生經迪吉上副眷倚益康壽祺

與順安知軍王太觀崇儀書

向吏別都獲依大幕披肺腑而相照均手足以逾親茲方
君侯改授於使名而蒙鄙繼從於帥辟朋簪一散官路
相望北塞西州邈焉異處前車後乘那得同游朔風已
寒尊體無恙恭惟辭才該敏術業宏長勲代素高有光
華於國史軍城非久即振發於家聲功名在前富貴如
拾倍綏吉履少副愚誠

樞密司徒侍中書

董翰將之大計罔知輕畫之所繇復侍從之舊聯逾覺
寵榮之為重竊以四方置使三路難才每至才端之選
掄尤難河朔之付畀蓋強敵限北洪流貫中金繒之所
歲糜艾棧之所時賦連營數萬餘卒既廣軍須繇地三
十六城乃繁吏稍轉給中費澄清具員宜求兼能以委
重寄如某者受性固滯與時濶疎曾乏器資之長屢更
事任之劇財闈倅職頃嘗左右於大農漕節宣風比厯
東西之煩使了無金穀之要術絕底涓埃之細勞更容

短才當此一道靖言所自良有由來此蓋伏遇樞密司
徒侍中首贊神機協宣宰論進人欲勸其後所以先錄
匪功與物不求其周所以兼收片善遂令駑猥訖冒龍
光敢不講圖利源區序官品罔有貳事少酬大鈞

代史館王相公荅高麗王王徽書

使節度朝專達鄉風之悃台使備位隨叨隆禮之辭祇
服謙懷逾深感抱伏惟某官器函剛實材挺沉雄弗蹈
近規自存遠識詩書襲治盛文雅於一方琛賫輸勤因

寵榮於百世春和所履時祉載蕃瞻企所縈敷陳匪悉
又代參政馮諫議答高麗王書

斗隔天隅日傾風問遠沐音題之及仍頒珍貢之餘
禮好兼隆銘藏逾劇伏惟某官傑才不世精識絕人面
內本朝自出勤恭之稟身先一國蚤聞禮義之興倍順
節宣永綏福祚其為瞻頌奚盡名言

回知州州王壽朋職方書

右某嚮者清衷擇守自付劇州吉旦臨民久開尊府曾

是慶音之緩有如嚴譴之加伏惟知府職方名為主知
才與時偶歷荷寵寄率收治功甫息按章之車未溫贊
計之席遽會朝廷之簡擢往綏淮海之流離曾未踰時
果聞速效班條之日已布仁擴惠以徠之去貫之民俄
扶老携幼而至者行甄最狀亟服異恩首枉誨函倍藏
感臆永言愧忤曷盡敷云

相州僉判韓都官書

比蒙俞詔得守故鄉方少慰于初心將前資于婉畫甫

懷章而就道遽改帥以出關事願兩違晤言載隔矧郎
垣之碩彥實王國之美才即聽褒陞倍祈輔毓

代韓玉汝列任謝兩禁而下書

任劇非長輒領漕臺之要部投閒未幾復躋延閣之近
班視職云初尸榮是懼竊惟朔野實控強隣軍須更稍
之仍繁歲斂月支之僅足且地賦之登有限而河防之
費不貲所以此方尤先他路董是外計可容短才如某
者性迂以疎器淺而陋頃緣誤擢嘗左右於大農比復

冒居歷東西之煩使終無利術茂建事功矧中年多難
之餘當一道要司之總愈云非據良自為容幸遇某官
曲掩孱虛陰加獎與助穆朝言之允俾塵邦選之優既
竊過恩兼還舊物誓圖薄效少荅厚知

問候新益州趙資政書

竊審就奉朝緡再臨井絡行前登於長道首入覲於明
廷造冒秋嚴載蕃時社伏惟某官元猷經世精識際天
挺忠絕不倚之亮誠篤孝悌甚高之美行頃鎮全蜀坐

熙一方遽被丁寧之詔音竊比乖崖之治蹟維時華夏
兼懷復慰於遠人當代趙張專美不容於前史靡俟更
書之及即聞舊德之圖蓋養天倪還謨王體

回謝北京判府司徒侍中書

久依門牆獨立幕府裨補奚云於萬一薦論以訖於再
三每蒙重言隨蓋衆觀父母能生而不能成就豈如盡
卯翼之始終王公或禮而莫或照知豈有洞肺腑之表
裏此有感臆之中出無復儷詞之外文直書悃悃具述

崖畧既寬苛禮之不至又損達尊而弗居飭管記以占
寵褒之過辭紆親翰以灑恩勤之別諭拜而伏讀出誇
僚友以傳觀藏以為榮期與子孫之相授恭惟判府司
徒侍中德包衆美澤在羣生鍾鼎不足鏤萬世之勲未
嘗挂口圭衮可以肆三台之體滋務抑躬矧朝廷之倚
方深而海宇之瞻有在行膺徽冊復鬯元猷

回淮南西路提刑潘華國都官書

右某爰初詔還本繼高賢之後曾未陞見已遷他局之

間不容復守於成規是亦參差於幸會汲水涇涸淮舟
亟行叙違不假於一言遂成輕別馳想忽經夫半歲中
抱沈疴向蒙惠誨之過勤職是報書之差緩春暄所履
時祉載蕃仰惟傑才休有令問能兼數器寧專刑獄之
重難勢匪久居別副朝廷之擢用茲衆人之望如此非
下交之心獨然願調燕興飲食之宜庸慰禱頌瞻依之
切

回紫微李舍人書

竊審恩賜函命詞掖登賢伏惟慶慰某官道貫醇深器
涵渾厚比屬祥琴之御適從名節之趨言動以書威顏
甚邇落黃堂之試筆豈特文章之工上法座之奏篇更
臻訓誥之體慶音未列榮問首臨媿林交懷名言非論

回蔡侍制書

伏審廣屯戍守始盛築於塞垣甫訖工徒爰垂褒於詔
檢建不拔之雄勢出無疑之偉謀丕績既成宜被歎嘉
之諭片言何補過形遜抑之辭行議顯庸益光大用

回徐州知府趙尚書書

陳缺郵音比若舊疴之作優游藩政第勤盛德之思順
履秋炎載蕃時祉伏惟某官壯猷經世偉業熙朝重德
以鎮世浮至誠以矯物偽宣風已屏方尊外牧之權議
道中台行貳上公之舊倍綏燕起少副瞻祈

回慶州王給事晉州陸諫議成都府張龍圖書

責重力疲屬舊疴之間作情勤禮厚枉榮問之遐臨矧
惟近侍之先暫布要藩之治民風觀省已洽於頌聲王

體謨明佇膺於詔召益綏燕餽前對龍光

回兩府遠迎書

比者蘄解帥符獲紆卿綬囊封漑懇願從便道之行召
節岳音趨赴明廷之覲載軀征馭甫次近圻敢圖鼎席
之崇首枉鈞函之重恩勤既渥勞來仍周仰止台光喜
接辭之有日叢然愚悃第戢感以無涯

賀杭州胡觀文書

伏審已即便時肇頒寬詔伏惟慶慰恭以某官量函悖

大道際醇深天下中庸適追于先烈上前智畧蚤鬯于
偉謀體貌兩朝股肱一德蘄解繁機之劇請從更鎮之
行重違左右之弼臣乃付東南之都府峻官儀于秘殿
兼領左魚大榮觀于故鄉迴踰駟馬靡俟政成于五月
行膺冊拜之三篇

回昌州張都官書

向者某官擁麾劔外取道關中媿主禮之缺然嘉賢規
之覲止睽違既久瞻繫良深遽首枉于珍函審已班于

寬詔勉綏福履行對恩章感頌并懷名言非論

吳副樞問候書

伏念假守闕中居有詔條之奉馳心門下坐疎竿牘之
修比蕃外除甫當入覲神明所右福祚甚蕃恭以某官
惇大有容直清不倚富賢人之德業貫夫子之文章奮
筆以對大廷早據珍策飛綏而步青禁寢服皇僚方尹
治于神幾遠貳謀于樞幄股肱一德體貌兩朝銜郵家
居矧祥琴之既御揚休陞見佇徽冊之所延翼載丕圖

緝熙盛化得伸素志允蹈昌言

回崔直講書

比審庠序師儒取德進以居其位廟堂公相推經明以
薦諸朝而某官學術精深履行純茂適當盛選以式諸
生行將擴道誼之淵源極聖賢之旨趣惇成善教續履
華塗首貺長箋增名寸抱

賀郭副樞書

伏審肇開幕府總制邊藩條詔所班兵民胥悅伏惟慶

忭恭以某官傑才高世偉績熙朝擁都統之旌旗帶中
樞之印綬出護諸將暫煩樽俎之籌坐制小戎行紀於
常之烈某方縻守紱阻叩賓閣就慶烈以無從馳懽誠
而第劇

回集賢相公書

始布詔條繼馳牋牘不謂郵程之緩未塵凡次之觀念
鼎席之久同枉均函而首及溫辭賁飾之相假厚誼兼
懷之兩存仍審順履春寒首調天緯神明所祐福祚其

蕃伏惟某官社稷宗工廟堂元老得位行道擴經濟之
初心尊主庇民鬯泰年之偉績倍祈自壽永副具瞻

相州王秘監問候書

遠提帥節益阻賢規眷言父母之邦幸被神明之化班
春伊始嚮福其蕃伏惟某官才貫幾深量函夷遠夙懋
元龜之德行聞大政之咨倍保壽康少符瞻禱

相州都監魏文思書

比蒙朝綉得守鄉邦望鄴下之多賢將親英槩總關西

之諸將遽失初心順履春寒益臻時祉更希精蓄以迓
褒章

回絳州薛司勳書

比聞移郡遽辱占書惟望重于外臺固才兼于數器竭
寵財餽食之效懋瞻國實邊之謀行之累年富有大計
忽假藩條之宣布就煩疆事之處裁然功名之間雖古
人而多忤而得喪之際惟賢者之能平舊績甚彰要塗
行復

回陝西都運孫待制書

審對恩函就更使節抗嚴旌而在道已久屬封枉珍牘
以飛文良銜重意伏惟某官才猷煥發業履精純物望
胥歸帝心特簡此暫煩于外計行歸涉于近司遐冒餘
寒倍綏妙履即諧晤揖尤據欣翹

回晉州陸待制書

比承墜翰審已班條矧惟厚望端才傑望高世入躋延
閣之要出帥邊藩之雄收經遠之壯猷以臨一郡報宜

民之善政豈俟三年行被詔音進參柄用

回北京王宮保書

始辭宰柄避當路之妨賢旋領守符許故鄉之均佚不
圖乘章之吏忽起開邊之師遂改帥于闕中俾總戎于
閩外節制諸將撫綏此民第已布于寬條曾未周于遠
畧敢謂保釐之多暇首煩管記之占書禮意過勤謙懷
滋厚不忘永好尤劇中藏

代王給事賀判府司徒侍中書

伏審懇避洪鈞榮歸素里剖麟符而作鎮露貂冕以觀
風造揆剛辰肇開尊府伏惟慶慰恭以某官誠明正性
忠亮一心揭日月之貴名協風雲之盛會道光台路勳
濟王塗二府游更已畢大臣之能事三朝允賴弗居真
相之極功力抗奏封請還政柄許辭尊于廊廟聊均佚
于鄉邦駟馬云歸揜蜀人之偉觀百壺所餞小奕奕之
前詩寧久衮衣之留即聞緜檢之召復由外相入冠上
台某適守關中方遙門下阻陪慶列第劇懽誠

集賢僕射相公書

伏審具告治廷誕敷贊冊進陞揆路增耀宰司伏惟慶
慰恭以某官社稷宗工山河間氣久亞宰塗之序力躋
王路之平崇賢黜姦寬役均賦底休功于甚盛屯偉績
以無前謨左右於廷中三朝所賴繫安危於天下一紀
于茲侔伊尹之保衡近汾陽之書考上台絕禮已殫體
貌之隆左相極班更益儀刑之重某身疎材館職繫州
麾趨慶莫遑馳誠第切

樞密太史侍中書

伏以西京講物允重三朝之辰東國著經實尊五始之
月恭以某官勲高盟府道濟治朝外鎮四夷峻具瞻之
尹石同寅二德永相比之星台上日始和繁褫備舍第
切壽康之祝阻修拜伏之儀

二副密書

恭惟某官際天傑識經世元猷總制五兵叅密謀於帷
幄發揮多算重強勢於朝廷順履王正永綏天祿某久

棲台庇造領守符就慶列以無從瀝頌言而第劇

河陽判府相公書

恭以某官鈞衡舊德金石純誠太史維垣早調元於台
鼎一相處外聊觀政於輔蕃開祚膺期對時納祉某造
膺守紱阻奉壽杯第瞻黃閣之嚴曷罄丹函之祝

三路帥書

恭惟某官任雄方面道秉上心兼制民兵矧恩威之並
著外攘敵寇固勲業之逾高順履一元載蕃百祿企賓

閣而且邈薦壽筭以無從

郭副樞書

恭惟某官傑才閎博偉畧沉雄暫虛樞廷實賴經謀之
遠都統帥路行觀偉績之成上日斯臨茂祥攸介某把
麾茲土望履無階第虔慶牘之馳莫遂壽杯之奉

回兩制以上賀書

領關中之通漕曾乏寸勞守劍外之劇州遽叨寵寄罔
功自訟匪報尤慙惟是短才屢更煩使諸公並進晚躋

侍從之班比歲再遷驟直圖書之閣復被蒙於渙渥俾
鎮撫於坤維陳避無從為容有自此蓋某官力開公論
坐政官榮遂使無庸之資亦當不次之任未攄感臆先
墜慶音愧戢并懷文陳非論

代王龍圖上中丞書

向以詔條所布風力不强間抱舊疴有愧昔人之卧理
親占溫教過煩長者之憂思積感殊深布書差緩恭以
某官氣資方勁業履淳修足臨長於諍臣爰疇咨於僕

老毅然正論已聳臺中之評沃乃清衷行收天下之望

西京韓龍圖書

爰初王府嘗備祿漕止同衆人粗了一職敢謂去離於
左右尚蒙記憶於姓名比從宦於關中復拜公於檠下
不遺故吏之賤俾廁大賓之筵拜嘉再三賜語良久聿
來帥幕亦有軍需論謝懇以稍稽銘感懷而獨在伏惟
保釐居暇福祚膺時恭以留守龍圖給事道德可師勲
業自任垂光近侍直延閣之圖書倚重老成掌別都之

管鑰行歸柄用即聽召還

回省副吳工部書

審承詔綉登賦財闡伏惟慶慰恭以某官識遠量宏文
醇行潔具青雲之賢器覘綠宇於書林旋擁守麾比持
漕節眷大農之經費贍給拜家實外計之委輸淵源金
穀從來選造尤曰難才碩畫所圖僉言惟允即雍容於
法從亟潤色於辰猷未列慶函首台榮牘永言感忭曷
究文陳

九日與四路帥書

素籥貫辰黃華耀節阻奉登高之樂第增懷遠之勞恭
惟某官經世偉才濟時距業出臨帥閫暫資綏御之方
入覲王朝行罄弼謨之蘊霜稜倍厲時祉載蕃

祠部集卷二十八

欽定四庫全書

祠部集卷二十九

宋 強至 撰

書

代魏公賀兩府書

斗揭寅柄帝乘震塗尊五始以書元風萬民而布治伏
以某官股肱玉體陶冶化工輔累洽之休期躋太平之
極致維春期之所嚮與歲厯以咸新某方守北門正遙
東閣茲阻壽杯之奉第伸慶牘之虔

賀密院書

春秋一元本歲功之所起天地交泰驗卦氣之斯臨伏
以其官峻德謨明聖辰感會制樞廷之勝算懋彛鼎之
膚功三朔始和百祥備舍某適司宮鑰方遠門墉阻薦
壽祺第深誠禱

代趙待制賀張唐公侍讀書

伏審被緝檢之新渥陟金華之近班增峻官儀允諧物
論恭以其官職致夷遠材猷博通茂視貴高之塗靜持

恬尚之守向淹回於儒館旋感會於帝震詞掖代言鼓
動聖謨之奧經帷進讀發揮賢蘊之光矧稽古之丁辰
方用文而輔治適圖峻德滋耀禁聯某辱厚知側聞
成命永言欣躍倍集悃悃

賀樞密王侍郎書

伏審顯奉制函禁躋宥省郎音傳報輿論愈諧恭以某
官學造本元體凝簡厚有鎮浮之德以聳乎物望有經
遠之業以簡乎上心曷服憲綱言必關於國體比書內

命辭每營于辰猷會帷幄之虛員慎樞機之制勝方權
網總擘之際睿選已明正才傑同升之期恩章不次亟
從內相適近置司太平可需幸君子之得位中外相慶以
聖王之用人矧辱已知倍深距躍

答澶州學士書

自去思麻嘗論感槩曾牋牒之不繼唯簿書之是供跡
日以疎心固獨在賴高明之所照貸簡情之可誅親占
教文過形體意不遺下邑之賤加惠上尊之餘惕然汗

顏俯以拜貺方春在序于氣尚寒仰維福綏益茂時祉
恭以某官班條盛府夷侯于終更改命外臺適圖於碩
畫不次之用可立以須庶令孤生永有棲倚

代成都趙龍圖謝雜學士及內制以上書

擢始寒生寢階法從誤中宸之簡拔總北道之書將河
既安流歲復小稔第云煩使曾罔寸勞而一歲之間再
遷者禁職數月之內就頌于帥藩竊惟近侍之中最在
羣公之末躡等以進度才安任顧叙讓之弗從信為容

之有自此蓋伏遇某官力開公論靡邨人言遂使無庸
之姿遽當不次之任未攄感臆先墜慶音益知函貸之
深弗即簡疏之棄永言愧戢曷盡名云

謝待制以下及諸路帥府書

領使北陲備官數月曾乏事功之建第循餽輓之常蒙
以菲才擢於不次付蜀門之劇鎮加禁閣之崇聯遂列
榮階訖無庸服勉收愧汗冒對恩章方恐懼于煩言益
省循于愚分踰涯已甚取誚宜然敢謂愛私首詒慶問

溢美辭而滿幅永嘉好以兼懷戢感良深文陳豈悉

與交代韓端明書

比者就蒙渥渥移守坤維鎮劇地雄俗繁物夥有江山
之控帶兼民卒之撫綏唯是短能曷知遠畧躡班行而
亟用漑悃悚以自陳讓不獲從愧無以釋賴繼高賢之
後具存善政之宜舊必告新願備言于矩矱小而任大
庶盡力以自循已飭單車即登長道揖風期而不遠獲
天幸以何多恭以治功休成謠誦騰洽介圭入覲行對

巖廊之睥容英爽暢謀行選家世之舊物倍調燕餽少
副欣祈

謝永興軍知府王龍圖書

幕府初開謂必收于豪俊辟書累上終無異于庸庸自
應所知之求莫如茲舉之確旋叨成命增悚懦衷竊以
陝服以西雍都為劇帥壓五路兵雄萬屯從來長人得
自選士雖指麾一定但專委于文書而綏御兩間亦與
聞于論議參是機事要惟傑才若某甚愚無他可采驅

馳州縣唯簿書期會之是知生長江湖何車甲訓齊之
曾識乃冒從軍之選殊乖責實之宜非保任之使然曷
僥倖而及此斯蓋伏遇知府安撫龍圖誼無求備請在
必行存心獎提極力論置始奏已光于疎賤矧知再三
短能絕跂于高明寧裨萬一第堅素守益放舊聞侍經
遠之談使少知于方畧免陋儒之誚期自奮于功名庶
幾立身以報知已過此以往未知所裁

與永興機宜張寺丞書

向從冗役殊負宿心遽應辟書得赴知己始被命而唯
喜旋省才而輒憂第適近聞安及遠畧儻陪堂上之密
議何所建明猶賴幕中之並游久已詳達再慮及此中
懷釋然矧惟高明嘗辱雅素促裝待發將往庇于末光
稅駕就安即前咨于餘論甫交春夏未適暄寒倍順節
宣少副依嚮

上前通判張郎中書

某效官小材為邑大府辱存鄉曲之愛視若子姓之親

吏事缺疎一切不問公庠掩覆二年于茲適蒙據依旋
值代去自嚴馭之還闕苦孤禽之失枝違離尚新感懃
如昨恭惟某官才猷膚敏方格淳修聖世淹回衆起潛
郎之歎士林企竦佇紓賢業之華

代元給事賀判都水監楊待制諫議書

伏審進承恩綍陞踐嚴途邛報初傳朝倫胥慶恭以某
官傑才經世精識際天名重本朝用兼數器出提漕節
總山海之輸將登貳財閭瞻京師之調度旋紓碩畫愈

動上知奉十行之詔除躋七諫之班列知謀通裕周水利于庶邦法從凝嚴直雲章于內閣行光台序入毫辰猷方庇末暉側聞新命永言竦行曷盡文陳

代元給事回澶相瀛定等州禁煙問候書

右某啟葭律布和桐華發秀過形體意特損書音恭惟某官經世偉才濟時鉅業出臨治屏聊布於寬條入覲寧朝行膺于大任適丁火禁益介春祺

代答澶州李待制書

伏念去德尚新瞻風方劇敢圖高誼特徇隆謙飭管記
以占音走兵弁而垂貺溫辭溢幅厚荷兼懷恭惟某官
名重本朝才周數器蚤列諫垣之秘仍躋延閣之華出
殿兵藩繫治功之連最入祇嚴召行幾政之參聞上為
廟朝倍綏燕饒

答諸郡知州書

葭律布和桐華發秀敢圖厚意特枉珍題順履令辰具
綏景福行甄治狀入對恩章感頌所深文陳奚悉

回賀懷州王大卿書

伏審顯承恩數增峻官儀伏惟慶尉恭以某官當世傑
才為時俊老效治功于已試懋風力以逾強聽訟棠陰
載光循吏之目陞華棘位適正名卿之闕

詔榮膺永言感忭曷究敷論

回蘇史館書

試篇甫上書殿旋登聽憲翔倍增欽忭竊以六科延
持起之士能直言者在選最高三館育非常之才為太

史者得名尤美某官識際今古學該聖賢歷程有用之
資俱踐絕優之等英聲已滿于天下逸軌絕攀于士林
豈唯觀冊府之書以文章為已任必也濟治朝之美發
怵他人之我先曾叙慶之未能遽占書而首及永言感
愧曷究文陳

回孫侍講書

伏審拜命紫宸解經朱邱伏惟慶慰聖人方嚮于儒學
敦教天支賢者親承于詔書進官王府某官識探聖聞

名重士林遽被僉諧首當華選應劉接武方勸講于經
文蘇晉飛聲佇代言于制命猥遺榮牘良戢謙懷

回郝太尉書

自總計臺居有文移之冗莫馳書舍缺諮福履之安特
枉教音益銘謙德恭惟某官忠勞許國材武絕人久試
效于塞垣累收名于勲冊旋應褒律爰建將衙統禁旅
于殿巖方深帝眷本天兵于樞幄行穆朝言伏望上為
邦家精調寢餼

問候鄆州李太尉書

籠財北道第日總于計丈引領東南遂坐踈于音尺伏
惟靜班寬詔翕萃龐禱恭以某官偉畧濟時純忠許國
挺生勲戚之胄傑出況雄之才旋建將銜往臨帥聞溪
堂式燕時宣樽俎之謀海宇所瞻行付樞機之任伏望
上為邦任精調寢興

回永興王龍圖書

向從煩使久去珍羣方倚重于藩垣遽占書于館記美

辭責飾之相假厚誼謙懷之兩存藏以為榮歆然感戢
伏惟班條有餘介福其蕃恭以某官業履純明氣質方
勁蚤列諫垣之祕旋陞延閣之華撫一道之兵民暫勤
西畧贊萬幾于神聖行常偉謨伏望順叙自持副時所
企

回史館蘇學士書

伏審給札禁扃飛綏祕館騫騰此始欽朴逾深竊以在
先皇之朝舉極諫而得中殊選者無幾直太史之筆用

試言而遂登此職者尤稀某官抱偉特之傑才蓄闔深
之精學高視當世前無古人奉對以條安危治亂之原
策名第一析理以論進退邪正之體占等最優既已佈
致身之功名行將觀報主之美政未容叙慶首辱詒書
感愧并懷名言非諭

與總管通判而下書

叨承辟命誤占恩章會大師之臨藩兼資綏御引短才
而入幕奚補聰明引江海之陋儒暗風雲之壯畧第從

知己祇負慙顏賴盛府之多賢論兵有素容狝生之竊
幸備位其間已促輕裝有涯伏謁永言跂抃曷盡名云

與諸官書

濫膺辟書獲從幕府所愧枵然之質將追賢者之遊竊
天幸以良多接風期而甚邇永言欣企無論悃誠

別少卿書

向者為邑河濱寄筇節下伏蒙某寬部官之禮數厚國
士之恩憐唯時銘心何日忘德逮賤子從知于幕府會

明公被召于京師念失據依思論感戀門有迂吏勢不
得以久留路逢還駒業已圖于一見旋聞大水驟瀆近
畿頗感道途之言遂從舟楫之便參差素願快悵愚衷
惟萬事之博通固一時之傑出當朝廷之大用非公而
誰為邦國以自持茲某所禱

代趙待制謝延州程宣徽書

伏蒙某官特賜答教并以覽先祖廬江集尊篇垂示者
大雅與觀曷深作者之意遺編增耀足慰孝孫之心恭

惟某官社稷宗工山河間氣宣風外閩縣地數州乃乘
坐鎮之餘能適行吟之興暢彌高之嘉句發既往之幽
光以某先祖徽命猶占當時弗偶卷生前之事業一肆
于詩借歿後之聲名特抒厥詠兼傳副本遠貺孤生猶
韓吏部之序楊公得匪貴人之存志元相國之遇嗣業
愛其大父之為文庶揚野史之前芳永與楹書而共秘
欽銘欣幸奚盡名言

賀唐密學授左諫議權御史中丞書

竊審就膺朝紱進領臺綱伏惟慶慰恭以某官才貫幾
深器函剛實性兼忠義之守學到聖賢之歸危言朝忤
于九天清議名喧于四海要官厚祿視如一羽之輕大
節高名坐若泰山之重七夷殊致明哲惟均罷籠朔野
之財未煖河間之席亟召登于憲府仍臨長于諫垣臺
中之評行開英主之聽天下之望復聳諍臣之風矧玷
雅游倍欣成命

代馮當世定州王尚書問候書

阻庇末光，逖瞻盛德。以官能以疎短，當尹治之浩穰。舉為寸慮之勞，坐致尺書之廢。伏惟樂班寬詔，靜鎮要邦。陰有神明來相，禧福恭以某官識凝簡厚，才貫幾深。偉業發揮于朝，端高文鼓動于天下。屯夷殊致，明哲惟均。居峻官儀，踐中臺之八座。出宣帥畧，領全趙之十城。行奉召音，進光冊拜。伏望上為宗社精調，燕興。

代賈魏公賀中書書

一陽出地，萬寶乘時。漸萌發毓之仁，宜展履長之慶。伏

以其官位尊台路敷濟王塗對日月之休明燮陰陽而
順正適開令序誕擁蕃禧方守別州正疏翹館莫前為
壽第劇馳誠

代馮內韓答洋州蔡郎中書

伏審治功第最褒典陟明遽正積星之聯益光守土之
寄慶音未講誨牘茲先篤雅卷以逾勤戢丹悰而增劇
善邦敷化方撫于遐眚寒籥貫辰倍綏于妙履

與北京諸官書

某拙直少機濶疎為治越再期而遂去訖大庇之焉依
旋從辟于闕中第馳誠于門下秋炎尚熾時祉載蕃仰
惟賢業之光已登最狀側聽上恩之懋亟服華章瞻頌
感銘并深下懇

答諸縣等賀到任書

某素昧戎機繆參帥畫纔備員于幕府稽論謝于牋函
首墜書辭過形禮意謙勤良甚愧荷并深

與王廷評太祝書

向者尚書開府小子字民會榮侍于親闈幸屢登于賓閣歷觀子舍之賢哲罕出君家之弟昆從辟西來馳誠北望秋炎尚熾時祉載蕃矧素蘊之甚充計華塗之可跂倍綏寢味少副瞻祈

代王樂道龍圖賀延州陸待制書

審即便時已開尊府伏惟慶慰恭以某官性惟忠亮學有本元彛桂管之須才分竹符而領帥兼祕殿之論讓重要藩之撫綏谿首服馴嶺表寧戢旋進陞于延閣仍

金史四庫全書
卷二十九
出護于塞垣賴樽俎之前籌付之遠畧寬朝廷之西顧
倚若長城教令肇宣兵民胥悅莫違就慶第劇馳誠

代河北都運趙待制賀昭文僕射相公書

春秋之一為元肇謹歲端之起天地之交曰泰適觀萬
物之通恭惟昭文僕射相公六德謨明千齡感會位劇
宰塗之冠禮隆尹石之勲勲力盛而弗居懇斬身退詔
旨嚴而竟起愈使道光上日斯臨茂祥攸介吾心馳翹
館跡繫外臺邈無拜伏之階第切壽祺之禱

集賢相公書

恭惟集賢相公秉國大鈞代天元緯彌縫衮職之闕調
序鼎司之和堯舜吾君拱揖几筵之上伊周諸已儀刑
萬笏之前開祚膺期對時納祉某適期潛節阻薦壽觴
第瞻黃閣之嚴曷罄丹函之祝

參政歐陽侍郎書

恭惟參政侍郎學際聖賢量包公輔文章飾至治之體
忠諒簡方上之心百度咸新少見貳公之效萬幾參斷

尚掩真相之才維日三元具時百福某籠財北道望履
高門徒虔慶牘之馳尚阻壽杯之獻

參政趙侍郎書

恭惟參政侍郎朱絰純音清廟偉器蚤貳中階之論道
適毗上德之持盈坐底斯民游大庭赫胥之世力躋至
治復開元貞觀之風三朔始和百祥備舍某久棲台庇
方總利權就慶列以無從列頌言而第劇

兩制兩省及皇親節度防圓刺史書

比者得守故鄉冀安病質請從就道屢私悃之上陳訖
被溫書許請光之入對適臨近旬首枉珍函親德範以
非遙懷感悰而兼劇

回省府館閣書

比者祇從召節遐飭朝鑾將入覲于朝廷適前臨于近
服敢圖臺閣之範遠枉牋函之音展晤有涯欣銘茲劇
回陳樞密書

伏審入對清朝還登陪幄載光睿選允穆朝言伏惟某

官莊重自持真清不倚蚤與神機之議屢從帥節之行
居然偉謀伏有勝算往綏一道雖所繫之非輕坐制五
兵在簽諧而尤重自聞新命適抱舊疴旋易地以云東
愧布書之獨後首紆誨翰增戢感悰

回滑州鈐轄王宮苑書

故鄉乞守方幸便安重客假塗比諧展覲旋成睽隔殊
極傾馳承已總于兵鈐遠首詒于函訊適臨窮臘益保
粹襟感祝并懷文陳非諭

回北京王宣徽書

故鄉得守方自適于初心全魏撫封忽相傳于輿議豈
伊綏御之要可屬衰疲之餘矧未奉于誤恩猶少安于
鄙抱慶音遽至已曲叙于交承禮意雖勤敢豫聞于惠
貺第深愧感奚盡名言

回青州歐陽觀文書

伏審就易東藩肇開尊府曾慶音之未講遽榮聞之先
臨祇服謙懷增銘感臆恭以某官際天蘊識名世生才

學造聖賢之歸性兼忠義之守更謀謨于二府懇避政
幾之煩老康濟于一時海拜條詔之餘矧元猷之尚壯
宜舊德之是圖僅聞五月之政成行被三篇之冊拜

回蘇省副書

向遇北轅克襄大事函封叙慰醪醴致勤茲初變于常
儀辱繼形于榮誨兼審載馳歸鞅復蒞財闡順履春詔
益蕃時祉行膺大用倍冀精頤

回北京王宣徽書

比者叨被恩緝與司留鑰曾是久勞之後懼非劇任之
宜然善政有條敢斬于必告而知才相繼靡俟于更為
伏惟某官道貫將明器函康濟早懋元猷之壯累煩遠
畧之宣召節促歸矧上心之傾佇政鈞圖舊行王體之
謨明即遂瞻承倍深欣頌

回集賢相公書

自遠台符適新年篇布書不敷慮浼于高明占教遽臨
過形于眷與兼審坐論大政舉集蕃禧伏惟某官一德

壯猷三朝元老才兼文武之術身繫安危之機伊尹倚
衡矧早謨于王體汾陽書考庶永慰于民瞻願如調護
之經以養崇高之福

代元厚之回賀趙團練書

竊審給札程文拜恩增秩天倫繼美朝論推榮伏惟某
官望厚宗藩學探聖聞弗流富貴之習自服詩書之勤
遽以名聞旋從試可即環伊之舊列加團練之要班經
蘊既據官榮此始比緣攷藝茲辱貽賤感慰并深敷云

匪悉

代魏公回陳龍圖問候書

比者總帥路以分符來臨本鎮會使車之隨詔歸赴近
班未索晤言遂成離別方企賢規之粹遽貽書舍之音
蚤羽翼于東朝行股肱于元后炎威云兆時祉載蕃益
護寢興少符瞻頌

問候昭文相公書

帥路獲兼實託大鈞之庇台躔在望阻瞻上衮之光溥

暑貫辰政幾宅慮神明所祐福祚其蕃伏惟某官道德
宗工儀型元老盟府早傳于偉蹟宰庭多守于前規比
深當守之知還踐阿衡之舊首調萬化方繫商相之和
美躬迓百祥更願留侯之彊飯上符帝倚下慰民瞻

回韓刑部書

比者外計擇使方來董于輸將小戎歛誠遽往煩于慰
納甫休行役良適燕興惟望重于本朝復才兼于數器
即膺顯用以紹先芬

回經畧司勾當劉郎中書

比喜還轅方接幕中之教未溫坐席遽從塞上之行清
範載遙珍函遠及益欽勤意良戢鄙懷

回慶州王給事書

自當帥領遽歷于炎涼遐企賢規弗忘于朝夕遠紆勤
問備戢高情惟近侍之垂先行嚴宸之促召益綏燕寢
茂對龍光

京西運司范司封問候書

金史卷之八十三
卷二十九
比者外臺甚適喜時奉于賢規中詔適來遽就更于使
節自聞新命屬抱舊疴悵餞別之不遑積攀瞻而尤劇
倍綏寢味前對褒陞

回慶成知軍書

專介之來長牋為覲以軍榜之初廢謂使令之下遷利
疚備論感銘第劇適臨炎酷倍衛燕興

代回河中府蔡學士書

紬書懷慙竊幸後先之相望典禮班條旋成內外之禮

處茲劇賢規之企遽承誨牘之詒審履歎炎載蕃禧祉
伏惟某官學優聖間名重士林才識兼長方提太史之
筆事功俱最聊剖諸侯之符行被詔音進光法從益綏
燕起少慰瞻馳

代魏公回北京王宣徽書

伏審介圭以覲方入見于清光留鑰所司仍重煩于舊
德承還大府以布寬條伏惟某官才貫幾深體凝簡重
粵從神聖之臨御未識公台之表儀暫被召歸數更進

對嗟相見之已晚美于壯猷知非常之賢行聞于大用
甫煖保釐之席即參造化之機首枉音題良深感臆

回河北都運陳龍圖書

竊審進加禁職出總漕符視事云初滕書首及矧惟厚
望獨映近班直內閣之圖書董外臺之經轂侃然賢者
之正論早嘗羽翼于東朝簡在聖人之淵表行置股肱
之上笏豈伊轉給可盡猷為益護寢興少符欣頌

回鄭州龍圖書李侍郎書

審即便時已開盛府首紆禁問備戢兼惟伏惟某官經
世壯猷端朝儒老備紆業已益重主知直延閣之圖書
適光禁職宣輔蕃之條教肇懋風聲倍冀自持行膺大
用

答趙州通判韓虞部書

賢範阻遙倏逾于半稔軍書鞅掌遂缺于單函何偉度
之崇謙枉盛辭而垂賁兼承妙履誕擁蕃禧伏惟通判
虞部器識純明材猷膚敏關決善藩之治已懋風聲延

登要路之游允光世德永言欣頌奚盡名言

回新梓路運使韓少卿書

審承恩詔出領計籌邦選既行朝言惟允矧兼才于數
器比贊畫于中畿績以凝時名逾列郡行引東川之漕
仰瞻大農之材佇經費之既充即褒章之增懋首紆榮
問良戢厚情

回邠州閻諫議書

叨榮累紀愧無遠業以濟時圖報一端竊效前人之引

類矧惟耆德嘗陟從聯淹徊守麾沉抑賢器加舊職之
未復輒露章而有聞何謙矩之自持枉誨函而多謝佇
膺大任倍冀珍頤感頌并深名言非悉

回韓刑部書

會遇關中曾晤言之未足淹回塞上已晦朔之載周夫
何雅意之存屢有珍函之及寇巢納款行復命于本朝
使節增光亟躋榮于要路秋炎尚熾時祉其蕃益護燕
興少符傾頌

回判侍郭待制判銓孫待制書

總帥路之劇權脩更累月邈禁塗之碩德增跂高風何
雅意之迥存枉珍函而遠及矧惟賢業親會聖人陟降
近班聊承于顧問發揮深蘊行與于謀謨素簞北涼粹
襟迪吉

回本路監司書

多病之餘久叨塵于任重寬恩所加方便息于故鄉遽
奉更書俾司留鑰懇辭雖確成命弗回矧惟守紱之紆

適在史臺之庇敢圖謙矩首枉慶函愧荷良深名言莫悉
回滑州蔡待制書

自館故鄉之風寢濶晤言每開順驛之筒必紆訊問何
雅懷之逾厚知高誼迥存審履春寒載蕃時祉矧惟帥
節久駐邊藩繫遠畧之勤宣已豐功之茂建名音行被
大任攸歸益護寢興少符傾頌

到任謝集賢及樞相樞使書

向辭宰柄旋董戎旃因累牘之自陳始懷章而得請仕

宦云歸于桑梓歲時獲展于松楸殊適初心尤為私幸
久勞之體如痛定而後思多病之軀合力窮而則止尚
期滿歲少息餘生遽移全魏之居留遂奪清漳之卧理
寬條所布僅能勉導于上恩遠累未明何以率先于帥
路胡然冒處抑有由來此蓋某官密啟睿心力陳宰論
以二邊之要固嘗備于使令而四履之封因許兼于綏
御庶殫薄効更賴偉謨

回都運使劉待制書

伏審顯對恩章榮躋法從計文兼總輿論僉諧某官方
格淳修才猷膚敏比陟諫垣之峻旋提漕節之雄內閣
登賢久穆瑞朝之選外臺倚重暫籠野野之財未列慶
音首紆珍贖其為感愧曷盡名言

代回新知府待劄書

竊審顯承明詔就領便藩荷盛意之隆謙累勤辭而垂
貺某官氣函渾厚道具粹醇學該經緯之大原論極安
危之至要經緯勤講早垂近侍之光令閣班條尚屈真

儒之蘊某比塵累牘得守故鄉雖居匪久安敢忘于必
葺而事有未盡當俟于畧張

與王宣徽書

叨被制函俾司留鑰莫辭成命爰促輕裝征馭載馳祇
赴別都之極近郊甫次首蒙珍牘之詒荷禮意之尤厚
懷感悰而倍切

回恩州知州劉留後書

頃從諸生已服盛德聞道先後固爵齒之迥殊效官東

西曾聲顏之未接敢謂過存謙矩首枉誨音伏讀載周
中藏尤劇恭惟知府留後氣函剛實才貫幾深復辟危
言早建安危之策總戎遠畧晚章文武之資矧久出于
廉車行進深于樞幄春和云半時祉載蕃伏望上為廟
朝倍綏燕鍊

與益路提轉書

比者竊冒恩書亟遷禁職罷籠財于北道俾班詔于西
州惟是罔功併茲假寵引守章而自愧幸使範之焉依

已治輕裝將叱疾驅之馭有諸清晤庶降既見之心欣
企兼常名云非論

代趙成都到任謝兩府書

分蜀門之印綬已玷恩章直延閣之圖書仍叨禁職據
非其地寵溢于涯竊惟天下之奧區無若坤維之劇部
兵民兼制政事倍繁遠畧弗明重任安寄如某者跡起
寒士世無顯人敢為身謀以欺日月之照嘗有言責輒
犯雷霆之威繼被遇于兩朝亟陞華于近署諸公同列

最曰晚躋一歲再遷遂當顯用罷輸將于北道俾綏撫
于西州寸勞未收環視增愧都乏致身之術率繫造物
之仁此蓋伏遇某官助平王塗借重國論致淺疏之近
器領險阨之名藩敢不動宣詔條力究利病雅俗俾歸
于坐鎮少布上恩用人雖取于後來庶逃物論覬續中
和之詠兼酬鎔埴之仁

賈侍中書

爰初冗官固嘗託于洪鈞訖至近聯曾未瞻于上袞比

司通漕久舍別都獲天幸以何多拜台儀而甚數廊至
誠而相接忘絕禮之自居移守蜀門去離材館飭嚴驪
而臨餞特借道路之光杼大句以寵行永為英衍之秘
雜然感戀萃厥悃悃恭惟某官業履崇高智謀廣大更
文武之二柄洞安危之大機書功旂常留範廊廟適均
勞佚暫寄重于師垣久渴儀刑行召還于公位伏望上
為宗社精調燕興

代賈魏公移許州謝政府書

誕頒明制祇被茂恩付漢水之印章還魏都之筦鑰飭躬趨而將命俾手舞以知榮某親會聖辰早塵台序旋兼文武之二柄曷究安危之大機總一道之兵民第勤遠畧上三年之課最曾罔寸勞自視晚齡久當重鎮游披懇牘靳守便藩獲遂請麾之誠良由造物之賜此蓋伏遇某官鴻猷華國巨業代天因密啟于宸衷致俯從于人欲埏鎔所及銘鏤無忘

回王尚書書

祇承俞詔獲改便藩乃屈高明繼掌離宮之鑰具存撫
抑首騰記室之牋政有俟于更張誼無煩于必告即馳
輕傳阻伺前旌企佩并深敷論罔既

回謝兩府親王使相遠迎書

詔移輔郡叨遂于私誠道出神都獲修于嚴覲特屈宗
高之體首紆勞來之音戢感良勤指言非悉

上知德州張仲巽屯田書

某少游諸公蚤服盛德自嗟仕路之晚輩未識儒林之

丈人比沿臺牒之行與攷郡廉之藝去取有所未至曷
裨賢太守勸駕之勤進退於此不遑遽蒙下執事虛襟
之禮既飲食以將懽恩之厚又車馬以為惠顧之光已
而旋歸復爾臨餞賜善誨俾知守職之繩墨授雄文以
示立言之範模違離尚新感戀如昨霜稜逾厲氣宇增
秋恭以知郡屯田行高古人名重當世治狀第一矧風
績之其凝召音以三佇恩章之茲及伏望為國自壽副

時所瞻

代上王尚書書

某仙籍後陳名附青雲之久仕塗累紀顧垂素髮之多
引愚分以甚明冒人知而安可向當遠宦俛就冗司委
吏仲尼之所為詐輕倉庾之氏歸志孟軻之所有祇恐
田園之蕪未能決去以拂衣尚爾投閒而志食所繫官
局將庇台光比列奉于公函敢少論于私悃伏蒙損崇
高之位勢曲趣寒蹤厚媮薄之時風親占溫教悚然伏
讀謹以行箴恭惟某官粵學入聖賢之微貴名揭日月

之上華要之選翱翔欲周八座劇班聊掌別都之鑰三
篇休命行調真宰相鈞倪惟哀達永有棲倚

上提刑王郎中書

伏審清表簡在明旨召還謂使旆之節南躬當前賀致
公函之缺上顏有餘慙仰侍優容少寬誅斥恭惟權府
提刑郎中器資渾厚術業宏長粵學入聖賢之微清風
承公相之後官聲所至物論皆歸適當睿哲之臨朝不
限才于累日按章朔野民適底于無寬參計甘泉財行

聞于有美俛惟冗官方備屬官雖欣君子之得時第服
孤生之失庇

回鄆州郭宣徽書

近審懇避中樞往綏東土云初開府即辱詔書迨此發
函已聞易鎮遂稽布謝尤劇愧懷伏惟某官勲濟王家
序先台路傳汾陽之將畧提汾上之帥符坐席未温遽
改遄藩之寄寇巢爰珍復歸陪幄之嚴銘頌并深諭言
奚悉

回諸道轉運及諸官賀判相州書

向辭宰柄旋領守符畫錦云歸幾遂鄉邦之樂夕烽有
警劇分疆場之憂比獲慶音已當帥職佩詞情之兼厚
輸悃幅以稍稽感愧并深名言奚悉

回運使范司封書

審奉恩緝就更漕節未諧修慶猥辱騰書伏惟某官世
濟大忠氣函間傑適接刑章之重甫臨陝服之交調兵
食于四方遽圖碩畫改使權于中道靡聽固辭聊藉輸

將之才即登要劇之任

賀延州郭宣徽書

伏審初見吏民已班條教長城之倚衆議所均伏惟某
官偉畧沉雄傑才英邁向輟神機之貳出當帥路之先
殆疆事之告成被詔音而入覲確然清郡奚堂之坐未
安復此臨邊海宇之情尚鬱行平小醜還奏丕功垂光
旂常制勝帷幄

回秦州馬給事書

西帥所總方圖綏御之宜重客初來未盡將迎之禮朕
遣尚邇企仰殊深何過篤于謙懷仍曲存于雅意猶屬
道途之勞頓已形牋牘之勤倦展讀載周感慙兼劇忤
閑閑府續獲馳書順履春寒益蕃時祉

回并州王端明問候書

自違風則適更歲端方疆事之是經曾郵音之未至猥
先流問祇益愧懷惟文武之兼資本公台之餘慶勤宣
遠畧屢易左符矧薄伐之故區實勁兵之要處境控三

敵地綿百城暫煩細侯往護諸將已聽威聲之著行甄
治迹之優倍綏燕興前服光寵

回賀提刑趙司封書

審膺中詔就領外臺伏惟慶慰某官術業淳深器資端
勁商于曲守益懋于風聲陝右按章未充于時望行圖
謬諤之舊亟還論思之班首枉書音尤增感臆

回閩待制賀轉給事書

祇奉綈函驟登瑣闥實罔功而被寵固匪服以抱慙曾

是短才訖無善狀同時並進景曰晚躋一歲再遷不由
顯效此蓋伏遇某官褒華所借言味有加致此泛恩及
於孱品尚未敷于感臆乃前墜于慶音愧戢并深名言
非悉

代張景言回諸處賀書

自叨煩使沆此彌年在餽運之非常于事功而何有被
誤恩于乾造付劇鎮于坤維并假寵光仍遷禁職尋啟
還而弗聽曾論謝之未遑首墜慶音備形體臆勤辭溢

幅厚飾過情感愧并深名言非悉

與交代趙龍圖書

就蒙中詔移領西州兩川之衝百賈所會中外所制兵
民實繁顧惟短才安有遠畧賴同升之先識嘗並貳于
大農今茲守符復繼賢躅固論契之莫厚容乞靈之有
繇舊必告新覲詳聞于善術守而弗失當謹奉于前規
再被十行之書將驅九折之馭風期甚邇天幸何多恭
以遠撫眈黎休成治績高名大節早取重于端朝正論

元猷行入毗于新政倍綏燕起少副欣祈

回同州趙大監書

伏審進膺中詔出領左符條教初班吏民胥悅伏惟慶
慰恭以知郡大監端朝雋老經世緯才風績蔚昭乎吏
師時名早動于人主官儀茲峻兼治于尚方人瘼所求
適臨于東郡靡胥報政行聽召還曾是單蹤方繫巨庇
未修慶問先枉誨音愧悚欣銘無論卑悃

祠部集卷二十九